

# 般若波羅蜜多心經

渥太華佛光山

南無本師釋迦牟尼佛 三稱

開經偈

無上甚深微妙法 百千萬劫難遭遇  
我今見聞得受持 願解如來真實義

般若波羅蜜多心經 唐三藏法師玄奘 譯

觀自在菩薩行深般若波羅蜜多時照見五蘊皆空  
度一切苦厄舍利子色不異空空不異色色即是空  
空即是色受想行識亦復如是舍利子是諸法空相  
不生不滅不垢不淨不增不減是故空中無色無受  
想行識無眼耳鼻舌身意無色聲香味觸法無眼界  
乃至無意識界無無明亦無無明盡乃至無老死亦  
無老死盡無苦集滅道無智亦無得以無所得故菩  
提薩埵依般若波羅蜜多故心無罣礙無罣礙故無  
有恐怖遠離顛倒夢想究竟涅槃三世諸佛依般若  
波羅蜜多故得阿耨多羅三藐三菩提故知般若波  
羅蜜多是大神咒是大明咒是無上咒是無等等咒  
能除一切苦真實不虛故說般若波羅蜜多咒即說  
咒曰揭諦揭諦波羅揭諦波羅僧揭諦菩提薩婆訶

佛光四句偈

慈悲喜捨遍法界 惜福結緣利人天  
禪淨戒行平等忍 慚愧感恩大願心

佛弟子

沐手恭書